

Liewe Doopouer

Ons is saam met julle opgewonde oor die groot stap wat jul gaan neem om julle kind te laat doop en sodoende hierdie wonderlike geskenk wat die Here aan julle toevertrou het, deel van Christus se verbondsfamilie hier op aarde te maak.

Heidekoppie gemeente wil julle as ouers graag met toerusting en ondersteuning bystaan in die belangrike taak wat julle het om Jesus sentraal in julle huishouding te plaas.

✠ Ons ontmoet die Dinsdagaand voor die Doopsondag by die kerk. Suzette sal vir julle nader aan die datum laat weet waar.

Die byeenkoms duur van 19:00 - 21:00 en is verpligtend vir alle ouers. Babas/kinders kan ongelukkig nie die geleentheid saam met die ouers bywoon nie.

✠ Ons wil graag hê dat julle as ouers voorbereid na hierdie gesprek toe kom en heg daarom 'n dokument aan wat julle vooraf moet deurlees.

✠ Die gebruik by Heidekoppie is om 'n spesiale herinneringskissie by die doopgeleentheid aan ouers voor te stel ten einde geloofsoordrag op 'n tasbare manier te bewerkstellig (meer detail word tydens die doopgesprek verskaf). Die koste verbonde aan die kissie is R210 en kan die aand van die doopgesprek betaal word. Plaas asb die korrekte bedrag in 'n koevert met jul kind se naam op. Betalings kan ook vooraf by die kerkkantoor gedoen word of elektronies geskied (Bankbesonderhede: NG Kerk Heidekoppie, ABSA Tjekrek, Brackenfell tak, Rek nr 145 058 0674, verwysing: doopvan bv "doopnel"). Stuur die bewys van betaling aan die kerkkantoor (021 981 2690) of e-pos aan ontvangs@heidekoppie.com.

Addisionele kissies kan ook aangekoop word, daar is ongelukkig nie 'n boekie en 'n kers in nie.

✠ Tydens die doopgeleentheid word 'n foto van die baba op die skerm vertoon om ons nuwe dooplidmaat aan die gemeente bekend te stel. Julle kan gerus solank 'n foto hiervoor uitkies. Die foto moet teen die Dinsdag wat die doopgeleentheid voorafgaan, per e-pos gestuur word aan die leraar wat die doop waarneem (ants@heidekoppie.com). CC asb vir Suzette in by ontvangs@heidekoppie.com en Jackie by admin@heidekoppie.com.

✠ Die doop geskied gewoonlik redelik aan die begin van die erediens.

Ouers kan enige plek in die kerk sit. Ouers verkies gewoonlik dat die baba / kindjie in die moederskamer bly by die persoon wat die baba inbring. Ouers mag die baba/kind natuurlik self ook na die verhoog toe neem.

Aan die begin van die doopseremonie sal die leraar die dooppare na vore roep. Die leraar hou die doopformulier aan die ouers voor en hulle antwoord hardop op die vrae (onder-aan hierdie dokument). Daarna sal die koster die persone wat die babas inbring (indien daar so iemand is), gaan roep. Oupas, oumas en eie kinders is welkom om voor by die ouerpare aan te sluit vir die doop.

Wanneer al die babas gedoop is, word 'n seënlied vir die ouers en hulle kinders gesing. Daarna word die babas weer kom haal (as die ouers dit so verkies) en na die moederkamer geneem terwyl die ouers weer hul sitplekke inneem.

✠ Indien vriende of familie foto's van die doopgeleentheid wil neem, wil ons vra dat hulle asb nie op die verhoog sal staan nie.

† Indien julle enige verder vrae het, kan julle dit tydens die doopgesprek met ons bespreek.

Leraars en Huise-op-die-Rots Bediening



Matt 7:25 “Die stotreën het geval, vloedwaters het afgekom, winde het teen daardie huis gewaai en daaraan geruk, en tog het dit nie ingestort nie, want die fondament was op rots”

Vrae waarop die ouers moet antwoord

- Bely julle dat, hoewel ons kinders as sondeurs in die wêreld gekom het en daarom onder die oordeel van God staan, hulle nogtans in Christus aan God behoort en daarom as lidmate van sy gemeente gedoop moet word?
- Bely julle dat die leer van die Ou en Nuwe Testament wat ook in die artikels van die Christelike geloof vervat is en in die kerk hier geleer word, die ware en volkome leer van die verlossing is?
- Beloof julle om hierdie kind, van wie julle die vader en die moeder (of voog) is, in dié leer na die beste van julle vermoë te onderrig en te laat onderrig?

Baie dankie vir julle samewerking!